

山西通志卷第一百四十五

山西巡撫都察院右副都御史臣覺羅石麟奉

旨修輯

孝義五

解州

北魏

閻元明少而孝著鄉里孝文太和五年除北隨郡太守元明以遠離親養悲慕母亦慈念喪明元明哀號上訴請歸養母目復明刺史呂壽恩列狀上聞詔州郡表爲孝門復其租調兵役令終母年後母亡服闋心喪不輟每當忌日悲慟感及傍隣昆弟雍和百口同居

後周

張元芮城人年十六祖失明元晝夜祈禱一夕夢神人以金篦療祖目越三日祖目痒因舐之果明後人立祠謂之張府君廟

隋

鈕因字孝政性至孝後周武成中父母喪廬於墓側負土成墳廬前生麻一株高丈許圍之合拱枝葉鬱茂又夏常有青鳥棲其上因舉聲哭鳥卽悲鳴時人以爲孝感武帝表其閭擢授甘棠令開皇初卒其子士雄少質直孝友喪父亦廬墓側負土成墳庭有一槐甚鬱及士雄居喪樹遂枯服闋還宅槐復榮高祖聞之嘆其父子至孝下詔褒美號其居爲累德里

唐

張琇父審素以儻州都督被誣爲御史楊汪所誅琇徙嶺南久之逃還殺汪于都城繫表于斧以訴父冤吏捕以聞張九齡欲活之明皇謂孝子不顧命殺之可成其志臨刑色自如曰下見先人夫復何恨

張志寬隋末喪父哀毀骨立爲州里所稱賊師王君廓屢寇掠獨不犯其廬鄰里賴而免者百餘家後爲里長于縣一日稱母疾急求歸令問其狀志寬曰若心痛則知母有疾矣令大怒曰妖妄之辭也繫於獄馳驗其母如所言令異之慰諭遣歸後丁母憂廬墓側負土成墳鳥巢于樹志寬哭臨鳥輒悲鳴高祖授以員外郎散騎

閭

曹文行與孫懷應相里志邵法同皆於事親居喪著有孝行

者任君義衛開皆數世同居者天子俱旌門賜粟州縣存問復稅有授以官者見唐書

衛元表南鍛事親居喪著孝行旌表門閭賜粟帛州縣存問復賦稅

都兒諫議大夫夏縣陽城奴也化城德方介自約或哀其餒與之食不納後致糠覈數栳乃受

宋

董孝章大中祥符時十世同居又有潞州邢濬八世同居隰州趙友七世同居所在請加旌表俱從之仍蠲其課調

景溫陝州芮城人兄弟異居積年大中祥符中樗樹五枝并爲一感其異復聚鄉人稱其雍睦

劉太爲醫助教居親喪絕葷者三年司馬光稱爲今士大夫

所難能作序賻禮

劉米一太弟孝廉謙謹事父母人無間言昆弟友愛奉養服勞終身不倦居鄉里遇有睚眦啓釁者輒勸諭使歸於好熙寧初巫咸水溢民多溺死永一家臨大河每日持竿立門外見他人有物溺水者輒爲摘取還之鄉人負債不償立焚其券

妻應字循之解州人少負智勇尚氣節祖興起家於解不數年遂致富盛元豐間虜屢犯邊朝廷出師深討應爲解戶籍首計家產過一縣之多科率比他處三倍應以罄產爲誓逮邊事少寧產已墮蕩八九未嘗有纖芥怨尤復自發憤整理家業不數年十倍於前會朝廷鬻爵以贍邊備應輸貲授將作監主簿子三人綬授益州助教絢應進士舉

官修武郎純聰明豁達有父風孫康慶州助教

司馬浩少攻詩凡八上不遇遂絕意進取專治家事爲人魁岸慷慨尚義於宗族恩尤篤司馬氏累世同居口衆產寡浩力營衣食贍之均無一私孀婦孤兒皆獲其所數十年無怨言祖墓迫隘族貧尊卑長幼前後積二十九喪浩於祖墓傍相地爲新塋悉舉而葬之弟子里早孤浩識其雋異教督甚嚴其後卒取進士仕至太常少卿所至著名先是鄉人導涑水溉田利甚溥歲久岸益深峭田旱不足輸租浩率鄉人請於令築埭下流復資其用溫國公爲撰墓表嘉靖十七年入鄉賢祠

司馬沂夏縣人曾祖林祖政父炳皆不仕累世同居食口甚衆貧無以贍沂幼孝謹父兄悉以家事付之儉勤以成其

家父兄甘旨不缺時有餘力及其鄉人沂以惡衣蔬食終身王安石撰墓表稱其謹身節用以養父母而道行于妻子嘉靖十七年入鄉賢祠

周文燦其兄嗜酒仰燦爲生兄或酗毆燦隣人不平而唁之怒曰吾兄未嘗毆我爾何離間吾弟兄也

蘇慶文夏縣人事繼母以孝聞母少寡慶文懼其妻不能敬事每戒之曰汝事吾母少不謹必逐汝妻奉教母得安其室終身

臺亨夏縣人工畫元豐中修景靈宮調天下畫工詣京師選其優者待詔翰林畀以官祿亨名第一以父老固辭歸養閭里賢之

金

張錦河東人大定十年尚書省奏錦自言復父仇法當死上
曰彼復父仇又自言之烈士也以減死論

張仁檄東漢河間相衡之後世爲荊州從事中郎將關內侯
征南將軍北郡太守宣威將軍等官明昌三年有司以仁
檄四世同居事聞詔表其門免族差二年太常博士毛麾
爲記云

元

趙天爵字伯廉嘗爲吏多平反惇行孝弟治家甚嚴三子皆
頎然玉立母喪廬墓三年父繼喪又如之惟蔬食菜羹不
茹酒肉不與妻妾見有司以聞詔旌其門復其身

王天爵字仁傑家饒於財有善行以粟貸人年饑但取其本
凶則已之鄉里咸稱義士值始生壬辰輒寢苦一月

明

劉復禮安邑人洪武間兄復初里選中人才時兄未有嗣復禮願代往授沂水邑丞令千紀丞坐失舉罪曰爲臣若此何以自白且如後代何遂不食死七世孫澤商于淮有貲累千金者貧無以償遂焚券

周遜夏縣人洪武間任分水主簿母喪廬墓三年又諸生秦應槐亦以廬墓稱孝

張斌安邑人永樂間募士北征兄當遣斌曰兄老無嗣請代往後以扈駕功授錦衣衛百戶辭歸養親兄果有子斌子祐孫璫璫胥顯

呂讓字志謙解人永樂間貢生事親以孝稱

張普圓安邑人永樂中以孝被旌

李福榮解州人正統四年以捐賑旌門

陳孟芝芮城人母卒廬墓寄宿樹下鄉人憐其貧爲置一室朝夕不繼胥安之又李捷科亦以廬墓稱孝

李文質南思忠胥芮城人正統間輸粟賑饑旌義民又李沛生亦以輸賑稱義

張璲夏縣人宏治間賑饑

呂完安邑人正德間父歿廬墓常有數狼伴之縣令疑其事黎明詣墳驗視果如人言

王旬解州人好學明義性克孝嘉靖乙卯地震被壓甫出卽問祖宗神主嘗建祠堂歲率子弟修祀事

張綱甫安邑人嘉靖丙辰輸穀八百石以賑荒

張繡字廷器解州孝廉昭之子敦厚遜讓父命析居貲產惟

弟所取概不問

張英字居傑解州歲貢以孝友稱官兵馬司指揮陞淮安府通判有惠政子璠服父喪泣血十日而卒

閻親字本登解州貢入太學日夜思親遂馳歸終身不仕侯加采字亮余解州人由進士累官四川遵義副使初任順德時聞母病卽解官歸兄病如之居官有廉仁聲

呂鳴韶字宗舜解州人事繼母撫諸弟以孝友著由歲貢任元氏教諭出俸濟貧生人競稱之

李希稷字又田解州人素行端謹事繼母撫孤姪以孝友稱由歲貢生任大同府教授

譚應春解州人幼孤力耕事母以孝聞又呂論事母趙曙居喪人咸稱之

侯大本解州人撫孤賑貧拾還遺金鄉里稱之

李通拾還遺金著義聲

李鼎新安邑武舉好義樂施事孀母至孝慮違色養終身不
會試

景于岡安邑諸生事孀母以孝稱奉旨旌表

劉鑑安邑烈婦李氏孫輸穀得官母病危沐浴請禱割左腋
肉作羹進之頓愈逾二紀始卒

景簫安邑人性孝父病危日夜悲號割股作羹進之疾尋愈
喬安安邑人侍父伯泰疾躬親湯藥衣不解帶者百餘日父
卒哀毀廬墓絕葷酒寢苫塊負土成墳父嗜桃李于墓旁
種百株甫三尺而花實母王卒廬墓如前塋中穀生雙岐

桃李秋榮

王鳳安邑人母卒廬墓有白狼伏墓左鳳不懼忽越牆陷
中以手扶出之狼再四回顧自後時來復歷三年

李瑛安邑人廬父墓三年絕甘旨擇隙種瓜備時祭孟冬猶
生人謂孝感

張光射安邑人事親孝晨興必請所食父遊止飲常預授錢
酒肆少遠則携家膳從之昆弟有無與共妯娌化焉事長
睦族並有仁讓聲

景嘉會安邑人學優行高事親能孝以弟嘉柱乏嗣病故日
夕悲慟竟卒

曹中丞于汴曰吾族老僕曹寧其子良良垂髫時以
爲生每得毫釐則爲父母具美味稍長傭工其父母
肉嗟乎此非孝子乎哉未可忽也爲作良良歌歌

曰曹寧夫婦病且老有子良良行孝道苦肋竭力得毫釐奉養雙親常溫飽我雖峩冠爲朝臣睹此美行感懷抱世上豈乏峩冠人上天下地能論討妻羅子綺愁不足不爲父母添布襖嗟爾良良是吾師愿爾多壽多財寶

劉允寬運學諸生事母四十年母嗜瓜豆身任桔槔母病攣夜哀痛竟得愈子廉民亦諸生遊曹于汴門母喪廬墓著六言訓正須辨無無齋集行世

曹希舜勤儉好禮又楊吉士性耿直時號楊公平

劉春力農課子解紛周給人並高之

楊琯安邑人少孤貧拾金還主孝事孀母官齊河教諭遷新安令冰蘖自持卒於官囊橐蕭然士民痛之

王承家運學諸生孝事孀母撫養孤甥以子貴封國子監學

正祀鄉賢

李茂春安邑選貢官無極令母切廬墓三年又王畿奠歲
官廣昌教諭吳琨諸生亦胥廬墓

張啟蒙運庠諸生事母孝母壽至九十有七歿未逾月以
毀卒

劉近寬安邑人有孝行官京倉大使以清廉著又路旁穿井
植樹行人賴之

郝本彰安邑人事繼母撫異母弟孝友備至家貧好學每喜
勸人爲善晚別妻子不知所終

宋登雲運庠諸生事母孝母八旬失明日夜號泣得名醫療
之明如舊壽至百歲

郭國泰山海關都司辭官養親撫孤姪如已子庚辰大祲出

粟數百石以賑族黨又劉有占任薊遼副總兵是年亦捐貲賑饑

解通夏縣人應召言吏部選法不公降河泊所大使到任歸處家雍睦五世同居又李棠四世同居

曹欽夏縣人弟婦寡而無子病且死欽謂子曰伊有諸女家貲任分給慎勿與聞諸子尊欽言無敢爭

曹恭夏縣人爲童子師拾還遺金數百兩行田間遇盜禾蔬者亟避之

張憲夏縣人與族叔瓚俱以淳謹化里人憲娶瞽妻生二子終身相敬不衰

孫天濟夏縣人母白邁疾弗愈剗股作羹進之遂瘳

楊休夏縣諸生性剛直克孝友廬父母墓凡六年卒於墓側